

ÁR NDUI AR TIMOTEO

Ar 'bet'o he'mi bi 'yot'a ar Pablo bi mēmpa ar Timoteo

Ar nzengwa

1 Nuga dar Pablo, ár mpotegi ar tsi Hmu Hesukristo, ngu xki hñuxkagi Jö ma Pohotehu ne ma tsi Hmuhu Hesukristo, gehnu ma ndo'mihu.

²Di ot'a nunar he'minu, Timoteo, ngu ma t'u'i, ngetho da zo'a'i ár mhö Jö ne ga ñ'emui. Jö ma Dadahu ne ma tsi Hmuhu Hesukristo da hwëk'a yá ñho, ne da ko ár mui da max'i gi 'bu n'ar hogam'ui.

Nsipabi ya gamfi da jamasu
ya ts'ont'uti xi 'ñep'u

³Ngu da a'anu Efeso ngi kohnu, ne ngi hñökwa nu'u togo utwa ya ku ma'ra ya nt'uti himbi zogagihu ar tsi Hmu. Da xi'a njap'u nú'mu ndi 'ba ar ñnu ngar ma Nmasedonia.

⁴Da a'i n'ehe ngi xipa ya ku hinge nda japamasu nuya 'bede hinte o yá ñnu, ne hiñ'otho ár ngöts'i. Möñ'u honse da ntsamfödi, hinte fa'spa ár 'befi Jö habu mpe ar ñ'emui.

⁵Da a'a'i ngi xipa ya ku njap'u, nda mhö n'a ngu n'a, ndi pe'sa n'ar hogamui, n'ar mfeni xint'axi, ne n'ar ñ'emui hindi ñ'entho.

⁶Ngetho 'ra xi hyehyu, ne nupya hinte mañho möñ'u.

⁷Xa ot'u pömpa ár t'ofo ar Moise emp'ö, hingi pöhmö tema di bonga nö'ö möñ'u.

⁸Di pöhu ár t'ofo ar Moise xiñho, nu'mu da t'uta ngu möñ'ö.

⁹Di pöhu n'e, ya 'bepate hinge mahyonibi ya hogajö'i. Go hongang nuya ts'oka t'ofo, nu'u hingi ot'a nö'ö nsipabi, nuya 'yot'ats'oki ne ya ts'ojö'i, nuya hingi hongag Jö ne hingi nsundabi, nu'u ho yá dada, yá nönö, ne gatho numa'ra ya hyote.

¹⁰Bi t'uni honi nu'u 'bengwi hingyá nthöti, nu'u 'bengwi yá mindöwi, nu'u pë yá mijö'iwu, nu'u möngag ya nhemhñö, ne nu'u et'a Jö made kate, ne gatho nu'u to'sa ar hoga nt'uti.

¹¹Jangu möngag ár hoga mhö Jö xa nsunda, bi zogagi ga mö.

Ár 'befi ar Pablo

¹²Di umba njamödi ma tsi Hmuhu Hesukristo, togo bi 'raka ar ts'edi, ne bi nugagi ngu n'ar hoga 'bego, bi 'yentk'a ha ma 'ye ár 'befi'ö.

¹³Mödi mam'et'o ndi tsangag ar tsi Hmu Hesukristo, ne xa ndi utsa

gatho nu'u mi teni, ne ndi nku'be, te gatho ndi japabi'u. Ha nunar tsi Dada bi hwégagi, ngetho hinge ndi pòka tema ndi ot'e, ne hinge ndi ñ'emui.

¹⁴Ne bi gobgatho ár nhwëki, ne njap'u bi tsá da ñ'emui ar tsi Hmu Hesukristo, ne bi tsá da hõnga nunar mhõte uñ'õ.

¹⁵Nunar mhõnu majõni ne mahyoni gatho da ñ'emui: Nunar tsi Hmu Hesukristo ba ekwa har ximhai da pò gatho ya 'yot'ats'oki, ha nuga ndi tóka gatho.

¹⁶Ar tsi Dada bi hwégagi togo ndi tópa ár nts'o gatho nu ma'ra, ne njap'u nda nheki ár ts'eti ar tsi Hmu Hesukristo. Gehnu n'ar nt'udi da hyanda nu'u nda jamfi, ne nda me'sa ar te hiñham'u da göts'i.

¹⁷Jange nunar Ndõ hiñham'u da göxa ár ts'ut'wi, dá hñõnga ar nsunda ne da t'e'spa ár nsu. Gehnu hingi tu ne hingi nheki, hõnsenu ar Jõ ne tóte ár mfödi. Dá njap'u.

¹⁸Ma tsi t'u'i Timoteo, di tsok'a'i gi umba ri mui gi mpe hár 'befi ar tsi Dada, ngu xki xi'a Jõ ngi 'yot'e, ne gi mpe ngu n'ár hoga ndogu ar tsi Hmu.

¹⁹Su ri ñ'emui, ne gi pe'sa n'ar mfeni xint'axi, ngetho 'ra bi hyep'u ne bi 'be yá jamfi, hingi pödi te da mepya.

²⁰Rayu, ar Imeneo ne ar Handro nu'u togo xta ent'wa hár 'ye ar Ts'ondõhi, njap'u da dits'i ne hinda mengi da zanga Jõ.

Hanja da tsá ga afu Jõ

2 M'et'o di 'bep'ahu gi mat'wabihu Jõ gatho ya jö'i,

ne gi tetwabihu da mats'i, hingi tsayahü gi umfu njamödi.

²'Yafu Jõ da maxa nuya ndõ ne gatho ya ts'ut'wi, njap'u ga 'buhu n'ar m'ui ter entho, ne ga 'yohu xiñho di numañhogihu ya jö'i.

³Ngetho gehnu xiñho, ne numañho Jõ ma Pohotehu,

⁴togo ne da mpo gatho ya jö'i, ne da bö nö'õ majõni.

⁵N'adar Jõ 'bui, ne n'atho togo 'ba made nõnga ya jö'i. Gehnu ar tsi Hmu Hesukristo, togo ba ekwa har ximhai bi njö'i.

⁶Bi unse ár te bi gut'a ar thai mi tu gatho ya meximhai, ne bi mhõnga gathoyu mi zonga ar pa nda mhõ.

⁷Jange bi thuxkagiga ngu ár mpote ar tsi Hmu ga mömba ár hoga mhõ. Di mönga nö'õ majõni, hindi kate, ngetho dá jamfi ar tsi Hmu Hesukristo. Bi thuxkagi ngu ár utate nu'u hingya xodyo, ga utwabi ar ñ'emui ne nö'õ majõni.

⁸Di ne habu gatho di 'bu ya ñ'ohõ, dá guxa yá 'ye mhets'i, da mat'a Jõ dar nt'axi yá mfeni, hindi pò yá kwe, ne hindi nemahñõ.

⁹Di ne n'ehe, gatho ya 'behñõ da beni xiñho hanja da ñhe, hinda ñ'ets'i, ne di pe'sa yá tsá. Hinda 'yeka yá ñõ exa yá nsu, xa di tuta nzeye ya hwexkabojõ, ya t'axdo, wa ya he ximhödi.

¹⁰Nö'õ xiñho da mēfi, dá me ya hoga 'befi ngu n'ar 'behñõ tsupa Jõ.

¹¹Ar 'behñõ dá 'yoxta ár mhõ Jõ mhõnga har nijõ, ne da bödi tema nsipabi, ne da 'yot'e.

¹²Hindi et'a ma xutha ar 'behñõ da uta ma'ra ha ya mhunts'i, ne

hinda m'ui ngu ár ñöxhmu ar ndo.
Nö'ö da me'ö, da 'yoxtho.

¹³Ngetho Jö bi hyoka m'et'o ar
Adan, ne ka bi hyoka ar Eba.

¹⁴Ar Adan hinto bi hyat'i, ha
nunar 'behñö hö, ne mi nkadi bi
ts'okwa Jö.

¹⁵Jange xa tho ya ugi ya 'behñö
nú'mu m'u yá bötsi. Mödi nuya
'behñö ma da mpohö nu'mu hinda
hyep'u yá ñ'emui, da me'sa ar
mhöte, ne da m'u n'ar m'ui xint'axi
di tsupa Jö.

Njanu da m'u n'ár 'bego Jö

3 Majöni nunar mhönu: Nu'mu
togo ne da nma'yo, n'ar hoga
'befi ne'ö.

²Ne mahyoni da me'sa n'ar
hogam'ui, hinte di ja te da
nk'a'spabi. Di 'ñe n'adar 'behñö, di
pödi xiñho nö'ö pefi, di pe'sa ar
hoga mfödi. Di pödi da 'yot'wa ar
ñho ma'ra, di ungar seki hár ngu,
ne di pödi da uta ma'ra.

³Hindi nti, hindi hongá ya tuhni,
hinder nts'o da dö ar bojö. Ar
hogajö'i, hinda kwe, hindi ne da
me'sa nze'ye ya bojö.

⁴Di pödi hanja da zixa xiñho ár
ngu, ne nuyá bötsi di ot'a nö'ö ne
Jö.

⁵Ngetho nö'ö hingi pödi da zixa
ár ngu, hanja da tsá da zi'spa ár
nijö Jö 'mu.

⁶Hinda tsá da nma'yo n'ar 'ra'yo
gamfi, ngetho yo ma da ñ'ets'i, ne
njap'u da hñonga ar mfei bi hñonga
ar ts'ondöhi.

⁷Mahyoni di numañho nu'u
hingya gamfi. Njap'u hinda 'be ár
tsá, ne hinda zo hár 'ye ar ts'ondöhi.

Hanja da m'u nu'u faxte har nijö

⁸N'ar maxte har nijö mahyoni di
nhumañho, hindi yot'a ár ne, hindi
nti, hinda nzibjö.

⁹Di su xiñho nuna ñ'emui xi t'uti,
ne di ñ'u n'ar mfeni xint'axi.

¹⁰Mahyoni da nts'ati m'et'o ha
hinde pe'sa te da k'ats'i, ne nu'mu
hö, da tsá da t'ets'i.

¹¹Njap'u nuya 'behñö n'ehe di mpe
har nijö, mahyoni di nhumañho,
hindi juxya nhemhñö, di pödi
xiñho nö'ö pefi, ne di ot'a xiñho
gatho.

¹²Nuya maxte di 'ñe n'adar
'behñö, di pödi hanja da zixa xiñho
ár ngu ne yá bötsi.

¹³Nö'ö togo faxte xiñho hár 'befi
Jö, dá t'e'spa ár nsu, ne njap'u
hinda ntsu da xipa ma'ra ar ñ'emui
pe'spabi ar tsi Hmu Hesukristo.

Ar jamfi xi t'utkagihu himi fö mam'et'o

¹⁴Di peñ'a nunar he'minu, mödi
di beni ngut'a ga map'u ma ga
k'ös'a'i.

¹⁵Ha nu'mu da tho 'ra ya pa hindi
tsomp'utho, gi pödi hanja gi 'yot'a
ar 'befi hár ngu Jö. Getnu ár nijö
Jö togo te, ne nunar nijönu su ne
ñonga nö'ö majöni.

¹⁶Xa döta nunar ñ'emui xi
t'utkagihu. Nunar mhönu hinjo'o
togo da k'ats'i:

Jö ba e bi njö'i.

Ár Hñö Jö bi damajöni bi 'yot'a
xiñho.

Bi hyanda yá enxé Jö.

Bi mhömba ár 'bede gatho ya
hái ja har ximhai.

Gatho ár nxidi ar ximhai bi
ñ'emui bi
ne bi ts'ixa mhets'i hár nsunda.

Mhõ, m'efa 'ra ma da hye yá ñ'emui

4 Ár Hñõ Jõ xi 'yotkagihũ xiñho
ar 'ñu, ne enõ hár ngõts'i ya
pa, 'ra ya ku ma da hye ar ñ'emui,
da 'yo'spa yá nhemhñõ nt'uti ya jõ'i
temba yá nt'uti ya ts'ondõhi.

²Nuya kate jõ'i ma da mõnga ya
nhemhñõ, ngetho xi ts'oka yá mfeni.

³Ma da hñõkwa ya jõ'i da nthõti.
Ne hinda hyegi da zi 'ra ya ñhuni
xi 'rakagihũ Jõ ga tsihũ di umfu
njamõdi, nuju dar gamfihũ ne xta
põhũ nõ'õ majõni.

⁴Gatho nõ'õ bi hyoka Jõ xiñho,
hinte ga tsanthũ, hõnse nú'mũ xka
tsihũ ga umfu njamõdi.

⁵Ngetho ár mhõ Jõ ne nú'mũ di
afũ, japi da t'axki.

**N'ár hoga 'bego ar tsi
Hmu Hesukristo**

⁶Nu'mũ gi uta ya ku gatho nõ'õ xta
xi'a'i, ne nu'mũ gi 'ñet'a ri mui gatho
nuya mhõ nõnga ma jamfihũ, ne ar
hoga nt'uti xka teni, njap'u hõ, gár
hoga 'bego ar tsi Hmu Hesukristo.

⁷Yo gi japamasu nuya ts'o'bede
hinte o yá 'ñu nõnga ya meximhai.
Nõ'õ gi 'yot'e, hyonga hanja gi 'bui
xiñho.

⁸Ngetho nõ'õ togo japi da 'ñõnga
ár ndo'yo ne da me'sa ar ts'edi,
hints'u jukwa nzeye ar ñho. Ha nõ'õ
umbár mui da m'ui xiñho, jukwa
nzeyewa, ne har te xi 'ñep'u n'ehe.

⁹Nunar mhõnu xta xi'ahũ majõni,
ne mahyoni gatho ya jõ'i da ñ'emui.

¹⁰Jange xa di umba ma muihũ
di mpehu, ne di thohu ya thogi,

ngetho di ñ'emuihũ Jõ togo te.
Gehnu ár ñõnte gatho ya meximhai,
'bet'ogihũ nuya xta jamfihũ.

¹¹Gehnu gi xipabi ne gi uta ma'ra.

¹²Yo gi ñhegi da nhu'a'i ngu hinte
gi põi ngetho gi bõtsitho. Nõ'õ
gi pefi: Gi nõ xiñho, gi 'yomañho,
gi pe'sa ar mhõte, umba ri mui gi
mpefi, tseta ri ñ'emui, gi 'bu n'ar
m'ui xint'axi, ne njap'u da deñ'a ya
ku.

¹³Nuya pa hindi tsomp'u'ho, gi
népa ya ku ár mhõ Jõ, hñu'mba yá
mui, ne gi utwabi.

¹⁴Jamasu nunar hogant'uni xi
'ra'a Jõ, ne bi xi'a'i nú'mũ bi hñus'a
yá 'ye yá ndõ ar nijõ.

¹⁵Umba ri mui gi pe nuya 'befiyu,
ne yo ma gi hyegi. Njap'u gatho da
hyandi 'yo di xu nuya ñho xi 'ra'a
Jõ.

¹⁶Nsusege ne jamasu ar nt'uti. Yo
gi tsaya gi 'yot'a njap'u, ngetho gi
mposege, ne da mpo gatho nu'u da
'yox'a'i.

**Hanja gi ntsixkwi n'a
ngu n'a ya gamfi**

5 Yo gi tsu ar tsi dõnzia, zofo
ngu ri dada emp'õ, ha nu'u
bõtsitho, ngu ri jödõ.

²Nuya tsi txu, zofo ngu ri nõnõ,
nu'u nxutsitho ngu ri nju, gi pe'sa
n'ar mfeni xint'axi nú'mũ gi xipa
hanja da m'ui.

³Xipa ar nijõ da m̃axa nuya
n'anxu hinto 'ñehe togo da mats'i.

⁴Ha nu'mũ 'ñe yá bõtsi wa yá
'beto, dá böhyu da su, ne da 'yot'wa
ar ñho m'et'o yá mēni. Ne njap'u da
ko'spa n'a tui nunar ñho xi hñõñ'u,
ngetho gehnu xiñho ne numañho
Jõ.

⁵Nö'ö majöni ar 'ranxu, 'büse ne hinjo'o togo da su, hönse to'mba ár mfats'i Jö, ne parxui mat'i ne apabi da mats'i.

⁶Ha nö'ö ar 'ranxu ot'a gatho nö'ö ne, ha hingi 'yomañho ár m'ui, hinga mahyoni da máxa ar nijö, ngetho nuya 'ranxu'u mödi te, pontho xi du.

⁷Xipa ya ku nö'ö di xi'a'i, ne njap'u hinte di ja te da nk'a'spabi.

⁸Ngetho nu'mu n'ar ku hingi japamasu nu'u te yá njawi ne nuyu 'bu hár nguse, xi ts'oka ár jamfi ne tötä n'a nö'ö hinxi ñ'emui.

⁹Nu habu di huxa yá thuhu ya 'ranxu t'umba ar mfats'i, hindi huxp'u nu'u hinxi thota hñun'ate njeye, ne hinxi 'ñe hönse n'ár döme.

¹⁰Ne di födi bi m'u n'ar hogam'ui, bi te xiñho yá bötsi. Xi umba ar seki gatho nu'u mi tsö hár ngu, ne xi xukwa yá wa ya gamfi. Bi máxa nu'u mi tho ar thogi, ne xi bödi xi me xiñho gatho ya hoga 'befi.

¹¹Yo gi huxa nu'u tsetho, ngetho zöta ar pa da ne da mengi da nthöti, ne hinda jwata ar 'befi bi ndui bi mepa ar tsi Hmu.

¹²Ne da duxa ar ts'oki, ngetho himbi 'yot'a ngu xki mönga m'et'o.

¹³Da nzön'u hinte pefi, hönse 'yo ne ya ngu. Hinge hönse da bö ya döñhe, te yá nemñhö 'yo pede ño'ö hindi 'ñepi da möñ'u.

¹⁴Jange di 'bep'a'i, nuya 'ranxu di tsetho, dá nthöti, dá te yá bötsi ne da su xiñho ár ngu. Njap'u hinte da za te da mönga nu'u togo hingi ne da nugagihu.

¹⁵Ngetho 'ra xi 'wege xi denga ar Ts'ondöhi.

¹⁶Nu'mu n'ar ku ar ñ'ohö wa ar 'behñö 'ñe n'ár mēni hár ngu di 'ranxu, mahyoni da umba nö'ö te k'at'i, ne hendar ñhembibi ar nijö da su, ne da tsä da máxa ma'ra nu'u majöni hinto 'ñehe to da mats'i.

¹⁷Nuya ma'yo tsixa xiñho ár nijö ar tsi Hmu, mahyoni xa da nhumansu, ne töte nu'u mpefi mömba ár mhö Jö ne uta ma'ra.

¹⁸Ngetho hár T'ofö Jö enö njawa: Yo gi tut'wa ár ne ar boi ne'mi töka ar t'ei. Ne enö n'ehe: Nö'ö togo mpefi, di 'ñepi da t'umba ár nthöhö.

¹⁹Nu'mu togo ne te da hyoxa n'ar ma'yo, mahyoni di 'bu yoho wa hñu togo da tsä da damajöni.

²⁰Nuya ma'yo hingi hegi ot'a ar ts'oki, tsui habu da hyanda gatho ya ku, ne njap'u da zu nu ma'ra n'ehe.

²¹Di 'bep'a'i hár nthandi Jö, ar tsi Hmu Hesukristo ne yá enxé xi hwañ'ö, 'yot'a ngu di xi'a'i, yo ma gi faxa n'a wa man'a.

²²Yo gi hu'spa ri 'ye gi 'ñexa ngut'a nu'u togo ne da mepa Jö. Ngetho nu'mu hingi 'yo xiñho, da mhö gi et'atho ri xutha. Pe'ske n'ar hogam'ui hinxi jaxt'i.

²³Yo gi tsi hönse ar dehe, tsi n'a tsi tui ar t'afi'obxi, da hñök'a nö'ö ar umui gi ntsawi hingi ne da hyek'a'i.

²⁴Ra dama nhekitho yá ts'oki mödi hinxi thö'spatho majöni, ma'ra da fö m'efa.

²⁵Njap'utho nu'u to ot'a ar ñho n'ehe, 'ra ya hoga 'befi ngut'a da nheki, ha ma'ra da nheki m'efa, ngetho hingi tsä da ts'e'ma n'ar hoga 'befi.

6 Gatho nu'u togo m'ego, mahyoni da numañho yá hmu, ne njap'u hinda ñhōmañ'u ár thuhu Jö, ne hinda ñhōmañ'u ar hoga nt'uti di ñ'emuihu.

²Nu'u togo ñe yá hmu ya gamfi, xa da umba yá mui da mepabi xiñho, yo ma da hyegi da 'yote. Ngetho nu'u togo hōnga nunar hoga 'bēfinu, gehyu yá hmōka ku. Utwabi gathoyu ya ku, ne hñu'mba yá mui da 'yot'e.

Ga 'buhu ngu ne Jö, ne ga umfu njamödi nö'ö 'raju

³Nu'mu n'a togo te gatho utatho, ne hingi uta ngu mönga ár hoga mhö ma tsi Hmuhu Hesukristo, ne hingi ne da denga ar hoga nt'uti otkagihu ar ñu hanja ga 'buhu ngu ne Jö,

⁴nö'ö ar jö'l'ö ar ñ'ets'i ne hinte pödi, xi 'be ár mfeni, honi togo da ntsahñökiwi. Ka di bohnu hyökwa yá ñho ma'ra, ya tuhni, ya nts'ani, ne hinto ne da ntsixkwi.

⁵Bi ehnu n'ehe ya ntsahñöki, hinte mañho njuki nö'ö mönga nuya jö'iyu. Xi ts'oka yá mfeni ne xi t'ökwa nö'ö majöni. Hōnse hongar ñ'emui, ne njap'u da guka ar bojö. Hye nuya jö'iyu.

⁶Majöni, döta ár njut'i nunar hogam'uinu, nu'mu ga ñhogamuihu nö'ö di pe'su.

⁷Ngetho hinte xta höhuwa har ximhai, ne hinte ga höxu.

⁸Nu'mu di pe'su te ga tsihu ne te ga hehu, gar ñhogamuihu.

⁹Ngetho gatho nu'u togo ne da me'sa nzeýe ya m'ets'i, töta yá ts'omfeni ne yá ts'ohyöke. Hinte mañho juki, ne njapabi da nhwati ne da m'edi.

¹⁰Nu'u togo xa mö ar bojö, ka bi pop'u gatho ya ts'oki. 'Ra ya ku xi denga ar bojö, xi hyep'u yá ñ'emui ne xi tho nzeýe ya dumui.

Umba ri mui gi ñöngar ñ'emui

¹¹Ha nu'ge Timoteo, ár 'bego'i Jö, 'wege hye gatho nuya ts'okiyu. Ne umba ri mui gi 'bui xiñho, gi 'yo ngu ne Jö, gi pe'sa ar ñ'emui, ar mhöte, ar ts'eti, ne nts'a'mtho.

¹²Tho ar xanthe, xa gi umba ri mui gi ñönga ar ñ'emui. 'Yot'a ar ts'edi gi tenga xiñho ar te hinda thege xi 'ra'a Jö nú'mu mi zoñ'a'i, ne ga damajöni ha yá nthandi nzeýe ya jö'i.

¹³Di 'bep'a'i hár nthandi Jö nö'ö to umba yá te gatho nö'ö te 'bui, ne hár nthandi ar tsi Hmu Hesukristo togo bi datwa majöni ar Pilato ár hoga 'befi,

¹⁴gi 'yot'a nö'ö di 'bep'a'i, gi 'bu n'ar m'ui hinxi jaxt'i ne hinto da k'as'a'i, to'ma ar pa da penga ar tsi Hmu Hesukristo.

¹⁵Ngetho nu xta zo ar pa, da ñ'u Jö nunar mpenginu, gehnu togo n'ase 'bui, döta ár nsunda ne pe'sa gatho ar ts'edi, ár Ndö ya ndö ne ár Hmu ya hmu.

¹⁶Nuna höse ár te hiñham'u da thege, ne 'bu ha n'ar hyats'i hinto tsa da zöni. Hinto xi hyandi, ne hingi tsa da thandi. Gehnu di ñepabi ar nsunda ne ar ts'edi hiñham'u da göts'i. Dá njap'u.

¹⁷'Bepa nu'u pe'sa yá m'ets'iwa har ximhai, yo ma da ñ'ets'i. Hinda hñuxyá da har hyate bojö. Dá hñuxyá da Jö togo hö ar te, ne xi 'rakagihu töte nö'ö

di k'athu, ne njap'u ga 'buhu ter entho.

¹⁸Xipabi da 'yot'a nö'ö xiñho, ne da me ya hoga 'befi, gehyu yá m'ets'i. Di pödi da 'yot'a n'ar ñho, ha nu'mu te da uni, di ponga ha yá mui.

¹⁹Njap'u to'ma n'ar hoga m'ets'i, gehnu umbabi n'ar ndo'mi nuya pa di 'ñep'u, ne zetwa yá mui honga ar te hiñham'u da göts'i.

Ár ngöts'i nö'ö bi m'empa ar Timoteo

²⁰Nupya tsi Timu, su ar 'befi bi t'ent'a ha ri 'ye. Yo gi japamasu nuya ts'o'bede hinter me'u. Hingi 'yo'spa yá mhö xi hñuxase nu'u enö xa pe'sa n'ar hoga mfödi emp'ö.

²¹Nu'u togo xi denga nuya mfödiyu, xi hyep'u yá ñ'emui.

Jö da hwëk'a'i ár mfats'i. Dá njap'u.